

四庫全書

史部

欽定四庫全書

史部

貴州通志卷四十四

詳校官監察御史<sub>臣</sub>徐如澍

刑部郎中<sub>臣</sub>許兆椿覆勘

總校官編修<sub>臣</sub>倉聖脉

校對官中書<sub>臣</sub>吳甸華

謄錄監生<sub>臣</sub>張曾秀

欽定四庫全書

貴州通志卷四十四

藝文

賦詩

明

聖泉賦

王杏

客有謂曰岡子曰耿茲牂州最爾一陬仰視中原  
猶寄黑子於人身之一脰其間怪石累累如吐如

各層巖業業如結如浮蟠蒼聳翠連亘綢繆是固  
子之所徧歷而旁收者洪邊之曲貴山之幽有水  
一泓天鑿其湫名曰聖泉謂匪人謀是殊方之獨  
擅亦賢士所遨遊子嘗知之乎不也日岡子應之  
曰吾嘗見茲邦之水矣高者懸瀑下者聚漚濶者  
為港窄者為溝廣不能容大壑之鱗深僅足泛坳  
堂之舟何乃茲泉之名得為聖者之流子言迂矣  
殆亦未之詳搜客曰嘗聞之天惟至公不愛乎道

地惟至平靡惜其實人文正氣中原多抱山谷之  
深溪流之巧彼蒼或為殊方者造之子胡視之乎  
眇漚也哉空言無徵泛聽亦藐口誦之真不如目  
擊之了請乘予之暇屈子之軺為子御重輪駕細  
裊借烟景於須臾拂風塵之繚繞相與觀茲泉之  
淼淼以明予言之非矯日岡子可之乃惟季春天  
日朗霽言秣其駒言膏其轡循郊墟以啟行遡層  
阿以深詣動微翠於干旌納輕颺乎短杪屹萬崖

之陰森忽一聲之清麗聲出竹以泠泠風拂面以  
泄泄客曰斯聖泉之際也請於是乎少憩以惠吾  
子之睇日岡子下車而睇之南山之阡惟谷砢砢  
中涵一窟甃以方圓冰冽其淅漱瑤滴璇石疏其  
罅排琚列蠙湛波光之上下捷瞬息乎飛漩俄而  
瀾漫漲於巨川倏而翕聚滙於重淵有若巨海之  
鰲兮噴濤吐浸以侵軼乎八埏霎颼風之恬霽兮  
吸領迴涎有若玉之麗於日色兮晶光蕩漾於藍

田迨其靜閤兮斂之於半畝之烟聽石鼓以為候  
兮輕重互為其闐任綸竿以為測兮高下各得其  
平迭往來之相繼兮殊過續之不愆迅時候之反  
覆兮妙消長於涖涓陰不能使之溢兮暘不能使  
之暖旱不能使之涸兮澇不能使之湮僅一斗之  
涵容兮浩氣吞吐乎旻天寄白雲於野草之隩兮  
宛潮汐之伸縮於大江之壘凝目以視兮凡幾轉  
圜窮神以索兮莫測其然將以為石竅之間而通

兮泥藪或有時乎閼填或以為沙水之壅而成兮  
陵谷又若是乎屢遷是必蒼蒼之上兮結構於太  
乙之前神以為之範圍兮數以為之陶甄星宿其  
揚波之脈兮河漢其濫觴之源浮槎無所於窺兮  
鰲人求涉其偏顧謂客曰是誠聖矣非子之言幾  
失此泉非茲泉之勝幾不味子之言繫中原之未  
見諒大化之獨全已無有於蜀川之峽又奚數乎  
昆明之滇也哉客喜而笑曰因野人之譏譏而見



與君子之明詮否者將不與畝澮之盈同消湧耶  
是固嘉賞之有待抑亦茲水之有緣於是汲水烹  
茶釣鱗煮鮮採蘋採藻充四羅籩泛元酒於蓬壺  
兮飛瑪瑙於瓊筵吸醴以遨兮縱真境之無邊賡  
考槃之章兮相與永矢於弗諼咏濯纓之歌兮挹  
爽於滄波之連逝者如斯兮悟造化之真傳以茲  
為鑑兮戒光景於流連日臨於酉兮驗消息之有  
先樵歌送清兮倚斜曛於崦嵫之巔徜徉天地兮

並匹馬以言旋次第其事於石間兮俟來者有考於斯編

鰲磯賦

江東之

耽瑞子遊黔二稔撫鎮無庸喟然長嘆偶從直指  
應公憩釣磯謁武侯祠見城南河水清漣與梁亘  
跨曰美哉水中不停民其魚矣公曰隄津未備瀦  
澤奚繇障而防之亦其事也相與鳩工壘石擁階  
宛然鰲極臨流覽勝遂作斯賦其詞曰余承簡命

言撫黔藩襟楚澤鎖滇垣背烏納面龍番牂柯金  
筑簇綺攢藩爾乃命駕乎綦郭飲馬乎流泉容與  
乎南明凝盼乎富川於以相厥攸宜卜築隄閑俯  
察仰觀上虹下案宛在水中水無漫渙迺進三老  
而問之曰孰有當於此者乎河水瀾瀾寧能使逝  
者如斯三老對曰僕聞成梁不易防川則難測而  
定之有基無壞民其永賴然則君侯之所指也毋  
亦務是乎願聞其概余告之曰是其源也未窮其

際來自夷筭達涪出定中滙貫城其漲也湯湯乎  
若洪濤之浮拍而怒號奔激其耗也涓涓乎若清  
泠之赴坎而潺湲漸瀝易盈易涸乍沉乍浮與汨  
俱沒與化俱流遠而環之曼寥邈而綽約迥而對  
之見阻隘而搏輞峻為之防驟汜濫而虞決低為  
之闔時淋漓而逐漉睠彼涵潭就伊沙渚方廣得  
衷下高合寧弱水中丘南溟蹲嶼積而能去散而  
還聚潁峯天表是曰署賓為章雲漢秀卓城闕左

蠻架筆傍列貴人衍清唐之寒漱兮挹犀馬之甘  
泉吸三寶之靈液兮貫明珠以綴連綰北汪之青  
柳擷西池之白蓮帶霽虹之腰玉兮極南浦之縈  
凝於是我臺机控我坻綫紆介在涯崖安於覆盂  
飛翬宕晃作鎮鼎湖象文昌與武曲運經緯以昭  
憲斷鰲首以立極兮卧長鯨之橫堰迴狂瀾於礪  
磧兮厥瑯玕之疊嶽浮海屋之龍宮兮訝蜃樓之  
非幻步登瀛以出塵兮共題名於塔雁左瞻右睇

徙倚婆婆俯濯清纓反射紋波灘聲陵影晨夕烟  
蘿若吟梁父忽起漁歌伊惟幽人漱流枕石心遠  
地偏山青水碧灌木叢陰匿景逃籍希躅嚴陵垂  
綸自適維九鼎以一絲兮客星隱而名高棹扁舟  
之去來兮汎不繫而逍遙遺名利於烟水兮委直  
鉤於釣鯨一水盈盈對瞻古廟錦官森嚴諸番並  
曜懷美人於三顧兮縈魚水之遺奇余心悅其盡  
瘁兮鼎足成而運移誕天威以擒縱兮烏蠻震而

靖夷儼遺容於尸祝兮据最勝之江湄嗟卧龍之  
蟠潤雖百世其可師為龍為魚一潛一見出處侔  
時蠖屈虎變既葆真而閔秀期人傑而地靈榮光  
塞河卿霑鬱蒸乘桃浪以遊瀚海兮謂熊飛而干  
城挽天河以洗甲兵兮騰八陣之遺英歇蘭若而  
奪琳琅兮淡二表於承明進可獻而退可懷兮憂  
則違而樂則行山之高而水之長兮登斯臺其含  
情匪大夫作賦兮勉爾榮名髦士壯懷之磊落惟

先哲之是程

國朝

他山賦

錢邦芑

瞻窳區之曠曼信山水之離奇乃黔地之荒僻更  
聳異而嶽崎既端嶠而陡削亦崢嶸而逶迤余也  
忘情塵累遐跡遐取邁茲異境心契神投闢萊穢  
於巖巘焚荆榛於岫丘崕嶷高下而畢現崩劣前  
後而俱收登椒巔以遙矚覺岷岵之奔投烟雲開



闔以萬狀氣象變眩而莫求若夫崧岫崢嶸以艱  
陟洞穴合沓而陰尋迴溪潏潏而滂潰大壑奔崩  
以懷靈隱窺地軸之維絡邈測天柱之矗撐至於  
叢柯偉木干霄礙雲榕樟翹負以飛曳枹栲楚捷  
而隱森春花列綺於岵岵秋葉驚霜而換金高霞  
華映於嵯峩客朱雲采亂於崑岑獨是奇石磈礧拔  
地插天或鼎鬲而砧硿或礎礧而屈鬢或橫仄而  
破瓦或逆豎而倒懸或龍盤而虎奮或鵬舉而鳳

軒或蛟騰而鴻下或獅怒而狻狂

叶魚軒切

或轟引而

旗導或羽展而翅翩或雲垂而烟斷或浪擁而濤

旋高者遏日下者迴嵐巨者藏谷空者隱潭皺者

膚蹙漏者竅含瘦者骨削薄者穀多散者星落簇

者毛毳仰者如嘯俯者如凝立者如望歌者如嬉

蹲者如怒踞者如思揚者如舞抑者如企端者如

拱斜者如窺前者如待後者如趨聯者如布斷者

如虧尖者如刺利者如剗既寂甍而巖薛亦磈礧

而岵峩

叶魚  
屬切

况齟齬而曲岵又巧妙而因依抑且

松檜叢倚栢杉掩映篁筠疎密以相間花卉參差

而互襯蘚衣斑蝕而綴蒼木根盤嵌而凸勁玉膏

涵毓而甘香石髓凝結而精潤沉復澗泉迸湧流

澮成河既汪洋以瀾滟亦湑澌而迴紆兼曲汀而

斜渚更危嶼而淤渚加之高柳叢生於浩淼枝柯

披蔭於洪渠荇藻絲牽而帶續芹苳斜刺而劍舒

禽鳥間關於林杪鳬鷺泳唼於蒲菰連峯倒影於

波底懸崖插根於水隅以至湍澌澗淥石折崖迴  
穴鳴竅答巒傾岫摧魚鳥騰躍而莫定柯葉浮盪  
而橫排山因水而幽窅水得山而紆迴維山有亭  
名曰拜石斷木結茅依林傍窟據岵岵之巖嵒當  
砦矜之峯岿破砦拱侍而碁羅砮砮碯砮以陡律  
汎復蹇烟佇嵐洗雨伴月時探奇而入影時代虛  
而剔骨雲根倒灑夫珠泉砥脚橫穿乎木甲

叶吉  
協切

維水有舟名曰恰受一葉浮波清流獨漱漾淪漪

而上下棹苔萍而簇湊遡輕漪而織影盪素澗而  
破皺涵嫩綠於霄光挹柔碧於空秀月采沉璧而  
耀金雨痕滌沫而漂漚

叶馬  
侯切

蘭橈宛轉而夷猶布

帆飄拂而邂逅維山之陽南望鰲溪山幽水繞泉  
石多姿既岷岵而明麗亦嶺瑩而舒徐盼立鐘而  
接招隱望洞鷺而訪石鷄登峯西眺山曰五雲千  
崖曉監萬壑曉深蒼巢仰瞻而神悸磳戶俛瞰而  
骨驚鵬鷃斂翮而莫度狄獮援蘿而懼深非禪棲

之脩侶孰追級而遐登厥峯之陰山名佛頂杉溪  
環帶清駛絕影峻嶒紫扉而難躋巖嵒嶙嶭而奚  
騁名利焜耀於危巘鐘鼓響傳於絕畛樹駐曦而  
虧耀巒障檐而蹴景石磊砢而層疊泉瀑注而瀉  
井西南遐矚湄水如綫庵曰西來塘名古練當水  
轉而山環亦村古而林蔭幽人於焉結契賢士或  
爾憑眷環山百里萃茲名區龍潛鳳舉霞隱雲遊  
叶羊明哲晦跡而耕牧英流韜采而魚枯乃復深

朱切

宵歌嘯詩酒歡娛聲林隔而遙答氣谷短而潛呼  
於是雅尚相憐淪落為友朝夕過從味親蘭臭風  
雨無阻於昏冥歲月雖賒而猶邁時登高以遐想  
或聯袂而紆遲時銜觴以遠望或白眼而移時當  
唱和之相得每感慨而淋漓何諸子之高尚矢肥  
遯以相期況山水之可樂奚荒寂之自疑且奇聞  
之共賞質今古而無欺復品行之修潔實風流而  
可師吾將托此以終老造化於我其何私

朱砂賦

田雯

考夫銀燭流於朱提銅山啟於吳會合浦有夜還之珠番洋有醋潑之瑁精鏐美蕩林邑螢飛黃鸝青雅錫蘭流潰西域之苜蓿葡萄南粵之珊瑚翡翠莫不居之為奇有以為利至若丹砂之名首見禹貢與砥砢而並稱入髹漆以成用鍾乳質近而形分紫英體殊而貌共烹而練之絳雪瓊膏餌而服之十洲三洞術傳鴻寶鷄犬昇雲書秘枕函杖



黎照誦稚川勾漏是求香山廬峯見弄衛公以之  
綸羹昌黎因而兆夢石可點兮逋償金可化兮采  
送訪邵陽之巔遺井尚存過洞庭之埜鑄鼎猶頌  
匪怪匪迂宜愛宜重於稽所產不一其鄉二酉之  
麓間出湯池之下深藏雖習聞而未覩今乃見於  
黔疆阡江盤水婺邑銅崖咸可掘而可採然忽閉  
而忽開未有開陽之夥者也於是奇羸之徒廢舉  
之士指烟嵐以爭趨驅舟車而來至相與募保傭

工畫壤列肆追一綫之蚓蛇探重泉之幽閔壁高  
支以造天脂親齋以覓地悵曉夕之莫知置死生  
於非意乍吐微銍儼獲大貝雜土石以同居寢礦  
牀而酣寐或如矢鏃或如斧劈或瑩如鏡或黯如  
漆棘韜比光火齊較色燦矣霞披歛然榴滴是稟  
離精聿鍾火德細若輕塵巨等拱壁壘塊陸離尺  
量斗計謂之砂寶辟邪魘魅豪客名家連城肯易  
鋪入畚出梯升綆墜附螳引猥擔肩負背載檢載

披且淘且汰審厥楷良別夫族類此什襲而韞藏  
彼貿遷而罔市別有沿邛笮老接澗孤莢措斗引  
竿漉末拾零足清溪而蝕趾目注粒而損睛波濤  
為之盡赤襟袂為之頓顛苟錨銖之可取雖纖忽  
其敢輕爾迺作竈支爐置礮施杵研之則我朱孔  
陽蒸之則揮汗成雨學團璣之走盤任點易而滴  
露更呼為求改號曰硃其實則一其變則殊噫噫  
此一物也既不充耳目之玩乃妄傳服食之神以

致多搜索於官牒遂視為希世之奇珍使者不言  
神仙願下令而長禁砂其莫產山谷何為苦此一  
方民

漏酌泉賦

田雯

富水之西去城五里峰迴逕轉隱軫駢闐在彼中  
阿有汜出焉名曰百盈字之聖泉慶慶泐泐潏潏  
涓涓虎鬚方聚魚目更煎閱寒歷暑不知歲年置  
準其中以驗後先俛仰深沉罔越罔愆莫莢謝榮

璣衡廢旋重黎解政常義罷占綫景徒測葭灰徒  
然螽運周髀之磨儀渾顓頊之天磨朴脩墜而未  
精郭許晰理而難詮一日之內俄頃之間甫除甫  
棄脩滿條蠲何必登觀象之臺臨鐵勒之邊商度  
次於壺遂較盈虛於巫咸哉此其所以為百盈歟  
方其進也汙行及其退也坎止始焉不驟終焉不  
已如日之經猶星之緯莫測其源莫竟其委孰鍵  
其闕孰幹其衷大旱竭澤而不焦巨浸稽天而不

圮以晝以夜以施以閉見兮磨游隱矣鳳舉神龍  
之時屈時伸至人之可出可處往而知返求而能  
與寸陰是惜尺度必軌不可得而挹其可得而徒  
耶此其所以為聖泉也歟吾聞水之潤地脈之周  
身一呼一吸一縮一盈釋氏數息而觀鼻黃老驗  
炁以養生動則俱陽靜亦凝陰華池灌溉湧泉引  
伸耆淫尾閭坻漏金莖百蓄一洩吐故納新散華  
斂樸翁虛闢清按之澄泓汲之困淳節宣輔和樞

紐調真繇此而推猶未可勝潮有春秋之信木有  
開落之辰雁乘之而去來蜚候之而蜚鳴抑聖水  
之稱不一其目琉璃之滢亳州之麓烏黿二池武  
陽一掬巫山之峰並此為六更讀鴻書亦云漏洩  
語其情狀比於鈞突惟厚德之難量斯佳名之屢  
托無怪乎間至錦鞍時停華轂望客對之而流連  
風人臨之而躑躅

石船賦

常安

維黔有石船形宛然杙於何日棹於何年扣之有  
聲琢之彌堅爾乃泊於牛渡河中停乎獅子峰畔  
遙倚白蘋之洲近接紅蓼之岸任其朝霧之迷聽  
其夕雲之亂幾經天上春秋更歷人間月旦且復  
檣收曲澗碇重盤渦高碍斗牛楫搖丹桂遠牽雲  
浪纜結修羅寒浸中流有月不貫冷涵水底無風  
可波空號羽毛似駛難稱葦葉如梭久阻思歸之  
棹淹留乘興之艤若夫叱石兮羣起而化羊射石



兮夜行而疑虎鞭石兮血出而海填煉石兮彩成  
而天補取笏而拜兮無為之石丈刻桐而扣兮臨  
平之石鼓昆明池兮鯨鳴零陵郡兮燕舞是皆故  
蹟之相傳猶有遺踪之可數羨此船也無沉而無  
浮誇此石也歷今而歷古是以長為礎潤不逐星  
流觸虛焉終無所怒不繫矣寧將何愁豈勞工倅  
之輩無煩虞姁之儔堪為僕射之居處不類孝廉  
之停留白鵠湖中舴艋頻泛太虛山下漆船常浮

惟是秋蘆歲歲迷離春水年年蕩漾汨萬頃之長  
流倚四圍之疊嶂縱操瓊楫何施不問布帆無恙  
悠然燕子之歌邈矣漁郎之唱於是鷁首霜鋪潔  
白螭頭月照空明擊楫聲聞澎湃扣舷響答噌吰  
霜滿秋郊紅葉落雨來春夜紫苔生庶可免朝來  
暮往又何須故送新迎豈非深鑒風波之險頓悟  
桑海之情哉

五言古

唐

送趙判官赴黔府中丞叔幕

李白

廓落青雲心交結黃金盡富貴翻相忘令人忽自  
哂蹭蹬鬚毛斑盛時難再還巨源吐石生何事馬  
蹄間綠蘿長不厭却欲還東山君為魯曾子拜揖  
高堂裏叔繼趙平原偏承明主恩風霜推獨坐旌  
節鎮雄藩虎士秉金鉞蛾眉開玉樽才高幕下去  
義重林中言水宿五溪月霜啼三峽猿東風春草

綠江上候歸軒

經亂離後天恩流夜郎憶舊遊書懷贈江夏韋太

守良宰

李白

天上白玉京十二樓五城仙人撫我頂結髮受長  
生誤逐世間樂頗窮理亂情九十六聖君浮雲挂  
空名天地賭一擲未能忘戰爭試涉霸王畧將期  
軒冕榮時命乃大謬棄之海上行學劍翻自哂為  
文竟何成劍非萬人敵文竊四海聲兒戲不足道

五噫出西京臨當欲去時慷慨淚沾纓嘆君倜儻  
才標舉冠羣英開筵引祖帳慰此遠徂征鞍馬若  
浮雲送余驃騎亭歌鐘不盡意白日落昆明十月  
到幽州戈鋌若羅星君王棄北海掃地借長鯨呼  
吸走百川燕然可摧傾心知不得語却欲棲蓬瀛  
彎弧懼天狼挾矢不敢張攬涕黃金臺呼天哭昭  
王無人貴駿骨騷耳空騰驤樂毅倘再生於今亦  
奔亡蹉跎不得意驅馬還貴鄉逢君聽絃歌肅穆

坐華堂百里獨太古陶然卧羲皇徵樂昌樂館開  
筵列壺觴賢豪間青娥對燭儼成行醉舞紛綺席  
清歌繞飛梁歡娛未終朝秩滿歸咸陽祖道擁萬  
人供帳遙相望一別隔千里榮枯異炎涼炎涼幾  
度改九土中橫潰漢甲連胡兵沙塵暗雲海草木  
搖殺氣星辰無光彩白骨成丘山蒼生竟何罪函  
關壯帝居國命懸哥舒長戟三十萬開門納克渠  
公卿如犬羊忠讜醢與菹二聖出遊豫兩京遂丘

墟帝子許專征秉旄控強楚節制非桓文軍師擁  
熊虎人心失去就賊勢騰風雨惟君固房陵誠節  
冠終古僕卧香爐頂餐霞漱瑤泉門開九江轉枕  
下五湖連半夜水軍來潯陽滿旌旗空名適自誤  
迫脅上樓船徒賜五百金棄之若浮烟辭官不受  
賞翻謫夜郎天夜郎萬里道西上令人老掃蕩六  
合清仍為負霜草日月無偏照何由訴蒼昊良牧  
稱神明深仁恤交道一忝青雲客三登黃鶴樓顧

慙襴處士虛對鸚鵡洲樊山霸氣盡寥落天地秋  
江帶峨眉雪川橫三峽流萬舸此中來連帆過揚  
州送此萬里目曠然散我愁紗幮倚天開水樹綠  
如髮窺日畏銜山促酒喜得月吳娃與越艷窈窕  
誇鉛紅呼來上雲梯含笑出簾櫳對客小垂手羅  
衣舞春風賓跪請休息主人情未極覽君荆山作  
江鮑堪動色清水出芙蓉天然去雕飾逸興橫素  
襟無時不招尋朱門擁虎士列戟何森森剪鑿竹



石開縈流漲清深登臺坐水閣吐論多英音片辭  
貴白壁一諾輕黃金謂我不愧君青鳥問丹心五  
色雲間鵲飛鳴天上來傳聞敕書至却放夜郎迴  
暖氣變寒谷炎烟生死灰君登鳳池去忽棄賈生  
才桀犬尚吠堯匈奴笑千秋中夜四五嘆常為大  
國憂旌旆夾兩山黃河當中流連雞不得進飲馬  
空夷猶安得羿善射一箭落旄頭

憶秋浦桃花舊遊時竄夜郎

李白

桃花春水生白石今出沒搖蕩女蘿枝半掛青天  
月不知舊行徑初拳幾枝蕨三載夜郎還於茲鍊

金骨

夜郎承恩放還兼欣復京師示息秀才 李白

黃口為人羅白龍乃魚服得罪豈怨天以愚陷網  
目鯨鯢未剪滅豺狼屢翻覆悲作楚地囚何日秦  
庭哭遭逢二明主前後兩遷逐去國愁夜郎投身  
竄荒谷半道雪屯蒙曠如鳥出籠遙欣尅復美光

武安可同天子巡劍閣儲皇守扶風揚袂正北辰  
開襟攬羣雄胡兵出月窟雷破關之東左掃因右  
拂旋收洛陽宮回輿入咸京席卷六合通叱咤開  
帝業手成天地功大駕還長安兩日忽再中一朝  
讓寶位劍璽傳無窮媿無秋毫力誰念矍鑠翁弋  
者何所慕高飛仰冥鴻棄劍學丹砂臨鑪雙玉童  
寄言息夫子歲晚陟方蓬

流夜郎永華寺寄潯陽羣官

李白

朝別凌烟樓暝投永華寺賢豪滿行舟賓散予獨  
醉願結九江流添成萬行淚寫意寄廬嶽何當來  
此地天命有所懸安得苦愁思

竄夜郎於烏江留別宗十六璟 李白

君家全盛日台鼎何陸離斬鼉翼媧皇鍊石補天  
維一迴日月顧三入鳳凰池失勢青門傍種瓜復  
幾時猶會衆賓客三千光路岐皇恩雪憤懣松柏  
含榮滋我非東牀人令姊忝齊眉浪跡未出世空

名動京師適遭雲羅解翻謫夜郎悲拙妻莫邪劍  
反比二龍隨慙君湍波苦千里遠從之白帝晚猿  
斷黃牛過客遲遙瞻明月峽西去益相思

贈黔府王中丞楚

孟郊

舊說天下山半在黔中青又聞天下泉半落黔中  
鳴山水千萬遠中有君子行儒風一以扇汙俗心  
皆平我願中國春化從異方生昔為陰草毒今為  
陽華英嘉實綴綠蔓涼湍瀉清澄逍遙物景勝視

聽空曠并困驥猶在轅沉珠尚隱精路遐莫及  
眊泥汙日已盈歲晏將何從落葉甘自輕

長安送友人之黔南

薛能

衡嶽猶云過君家獨幾千心從賤遊話分向禁城  
偏陸路終何處三相在素船琴書去迢遞星路照  
潺湲臺鏡簪秋晚盤蔬飯雨天同文到鄉盡殊國  
共行連後會應多日歸程自一年貧交永無忘孤  
進合相憐

元

七星關

馮福可

點蒼何蒼蒼環以西洱河百年雨露恩詎敢煩天  
戈轅門振烏撒衣帶踰牂柯巨險久已平故關尚  
陂陀云胡七星名亦復重不磨

翠屏山

何弘士

俗山如俗人過眼不相揖據鞍無好詩羈思迫胸  
臆行行見翠屏景意兩相適烟蘿幕青黛山厓剝

蒼壁雲霞油然生杉檜森以立鳴禽遞清響飛泉  
散珠急我疑有幽人相傍崖居密朝餐紫霞英暮  
啗香松實

明

獨嘯亭

周瑛

一年卧衡門復領楚西牧此行誰使之應不為斗  
粟和衷乏僚案供御少徒僕訟庭日無事何必修  
邊幅每當風日佳散步自捫腹仰天舒鬱襟大塊



苦局促正聲發唇齒餘響振林木浮雲斂太清長  
風動虛谷雖未諧宮商猶堪擬絲竹緣非不平鳴  
祇用矯庸俗新亭已結構徙倚一寓目燕雀莫驚  
猜吾將逐黃鵠

題飛泉

周瑛

下馬碧山阿散坐清溪濱遐觀千古上地下人已  
陳引手弄清溪與君懷抱均安能被炎汗日與簿  
書親

北山深窈窕遠接魚樵蹤中有寒泉水如奏嶧陽  
桐灑雨映疎竹隨風鳴長松坐久人跡絕孤雲生

前峰

杜甫愛西溪淵明登東皋而我有高興石面覲飛  
濤平生得喪心對此輕秋毫不謂宣尼遠白日坐

聞韶

飛泉落深潭波瀾方渙渙中有得意魚往來或聚  
散銜杯意方適忽爾接奇玩解組嗟未能臨川發

長嘆

西園

王守仁

方園不盈畝，蔬卉頗成列。  
分溪免甕灌，補籬防豕躋。  
蕪草稍焚薙，清雨朝來歇。  
濯濯新葉敷，熒熒夜光發。  
放鋤息重陰，舊書漫披閱。  
倦枕竹下石，醒望松間月。  
起來步閒謠，晚酌檐間設。  
酣時藉草眠，忘與隣翁別。

水濱洞

王守仁

送遠憩岵谷濯纓俯清流沿溪陟危石曲洞藏深  
幽花靜馥常悶溜暗光亦浮平生泉石好所遇成  
淹留好鳥忽雙下儵魚亦羣遊坐久塵慮息澹然  
與道謀

謫居龍場結草庵居

王守仁

草庵不及肩旅倦體方適開棘自成籬土階漫無  
級迎風亦蕭疎漏雨易補葺靈瀨響朝湍深林凝  
暮色羣獠環聚訊語龐意頗質鹿豕且同遊茲類

猶人屬匏樽映瓦豆盡醉不知夕緬懷黃唐化畧  
稱茅茨迹

陽明小洞天

王守仁

古洞閔荒僻虛設儼相待披萊歷風磴移居快幽  
塏營炊就巖竇放榻依石壘穹室旋薰塞夷坎仍  
掃灑卷帙漫堆列樽壺動光彩夷居信何陋恬淡  
意方在豈不桑梓懷素位聊無悔

送劉美之太守赴銅仁

杭淮

園柳何青青江草萋以碧送子適萬里執手情脈脈嗟彼雲中雁翱翔依沙磧不為稻梁謀何以有南北努力慎所之悠悠豈終隔

送王陽明謫官龍場驛

杭淮

白日野中微浮霾結朝陰送子遠行役躑躅傷我心豈無良朋儔不如子同音寂寞及窮荒誰能念浮沈願為雙玉軫相隨麗瑤琴

聖泉篇

楊慎

龍圖天生水義畫山出泉睠茲密沸流肇自混沌  
年盈涸在頃刻消息同乾坤塵刹變朝夕億垓無  
貿遷帝臺盎漿下神漢壺嶺巔冰雪姑射質風露  
綽約仙竇雲騰滴滴泓月涵涓涓蝦鬚穿皎鏡蟹  
眼瞭淪連岷觴衍遊聖均舟喻思玄迷蹤鬼方霧  
蘊真羅甸烟詎逢陸羽品那遇桑欽傳名公紆勝  
引喜招陶芳筵折簡開蒼蔚飛觥延霽天玉珂鳴  
重嶽金艾明華田碧潏灑柔翰翠微鑑洞絃臨淵

稱混混倚谷望塔塔麗闌磬鼓動迴谿黃燭然荒  
塗欣長會興言遂成篇

烏撒喜晴

楊慎

易見黃河清難逢烏撒晴陰霾既已豁險道況復  
平蜀日杳千里滇雲惟十程江花與江草異國看  
春生

平壩南村

何景明

朝出城南村策馬入荆杞村中八九家烟火自成



里兒童候晨光稍稍荆扉啟田隣務收穫時復披  
草語昵昵何所云但云好禾黍

秋陰結林霏細雨灑茅室牧放止近郊牛羊不相  
失廣園散花林平時藹風日長幼不出門咸知戀  
倚匹喧喧車馬中徒為慕高秩懸輿當何時可使  
志願畢

沉沉古陂水日暮寒更綠隔阪見居人蘿蔓經草  
屋摘禾留客飯採薪伐枯木童穉持竹竿雨中放

鷄鶩區區化外國猶得覩淳朴

普定

何景明

鼓絕掩山城空堂思超忽孤燈明夕惟悄悄涼風  
發落葉何飄蕭飛螢互明沒客憲臨古寺坐待微  
鐘歇

清平令

何景明

清平之縣令不識何為者庭前長野桑庭後長山  
檟猛虎上我城青娥啼我舍昨日出城去騎馬到

部下部民道遮之持刀殺其馬入門顧妻子所居  
無完瓦秋風吹樹木白日落原野永夜空城中哀  
哀淚如瀉

平越

何景明

清晨發平越霧暗山益密僕夫各相戒路途恐迷  
失薄午游氛清參差衆峰出鷄鳴溪谷中始見厓  
上日雲葉分沓冥高原被華實秋風起叢林興感  
乃非一悠悠遠行邁歷險難具述

黑石樵歌

程顥

黑石落窮崖，峻嶒亂溪澗。獨有執柯人，忘却登山苦。  
朝出弄蘆笙，暮歸敲石鼓。風清一肩息，黃童和諸父。

東山

吳國倫

九日不登高，烟霞澹林麓。十日秋氣清，東山倚天矗。  
複道舒新綦，琳宮隱扶木。振衣躡其巔，一縱千里目。  
荒城大如斗，衆山渺焉伏。掃石坐層雲，鳴鐘

發幽谷僧至焚妙香居然在天竺忽開西域蓮  
彼南陽菊何言非土良遊此築堪卜義馭難可停  
且倒樽中綠

別貴竹諸友

張翀

十年與君遊千里與君別把袂意不言含杯氣欲  
絕漸隔瀟湘雲空留夜郎月一曲瑤琴彈知音對  
誰說

川上雜咏

李渭

巖阿黃虞民獨志惟田園日出復日入不知城市  
喧去草培嘉木兩者不並存汲隧甘自拙抱膝聽

禽言

野步任顚顚所到成流連  
沉復泉壑清渡雲澹浮  
烟石高坐垂釣月出歌放船  
達人各有懷那復論  
百年

雲渚澄素景  
蒼澹披秋夕  
沙溼沸蓀晚  
潦盡見村  
宅一鶴自零丁  
千峰散虛白  
揮手弄潺湲  
借茲洗

形役

山影江半陰渡口喧人語東林精舍近幽人自來  
去漁父歌放逸澹然寡塵慮為愛乘槎行直到水  
窮處

遊嵇公泉

李渭

吾與二三子覽勝求前賢嵇公昔垂釣傳聞於此  
泉披雲尋往事流水不知年山空琴欲冷樹古鶴  
來眠

聞黔中平志喜

林堯俞

皇風式九圍聲教暨邊鄙由來西南夷難用漢法  
理其居雜編氓其道羈縻耳撫馭乖所宜騷騷孰  
為弭黔本隸鬼方滇蜀相唇齒各自有君長號令  
一齊止昨者糾諸樊西川亂無紀況乃安奢酋水  
蘭負堅壘目覩貴陽城疊擅同折筆我軍寡且弱  
日夕呼庚癸相距及歲餘如肉置諸机疾聲望外  
援割髮而噬指幸然揀兵至背城拚一死又逢賊



氣憤乍合便披靡既以解重圍亦足療瘡痍雖未  
極兵威庶幾褫不軌斯維社稷靈人力詎至此但  
此全城功僉云李與史願懷往事虞勿生戰勝喜  
如聞老鵝關去城僅五里

城南江亭學使壁哉韓公邀同參知大涵謝公小  
集五首  
謝三秀

旦發虹梁門暝投漁磯路春水半篙綠褰裳不可  
渡溪深烟復深遙遙辨庭樹

官柳變寒條二月孤鶯早細水浣殘花幽風梳短  
草川原霽人目曠然愜探討

羣公結駟處乃在清川曲危石疊飛雲奔泉漱鳴  
玉隔浦見茅茨寒燈影深竹

空亭留燕言山牀壓春酒以茲川上意緬懷魯中  
叟白鷗不避人矯翼下溪口

踞此松間石盈盈春一望秀月吐層潭清輝幾千  
丈何處夜漁歸前村人語響

謫仙橋

鄒元標

盤谷清溪上滴滴山間鳴盤谷透且邃山泉流且  
清酌此杯中飲欣然得我情坐覺塵蹤遠還令世  
慮輕欲構留雲窩時來濯我纓

龍山

鄒元標

曲徑排雲上層崖插碧空古木環青靄烟霞亂石  
叢磨碑拭古偈翻經一叩鐘曇摩今何在偃佺竟  
不逢真有逍遙趣冷然欲御風

飛雲巖

鍾惺

吾聞山出雲巖則雲之室茲巖雲所為雲與山為  
一山雲老亦堅浮者化而實初至怯空遊梯磴乃  
歷歷下上於其間步步可遊息石以雲為神雲以  
石為質石飛雲或住動定理難詰草樹過泉聲尋  
之莫可覲

曉行黎越道中

陳際泰

高霞飲朝氣水木澄空宇嵐光半欲浮輕鷗依淺

渚峰影遠近開次第如展羽  
春溪雨乍收景色特  
清舉好山無數青歷歷真可語  
久置塵勞中煩悶  
深自苦忽得此蕭曠心神淡  
相取耳目引清端遇  
物都有主一往果情深何必夢天姥

遊雙明洞

張瑞圖

誰於疊嶂中闢此虛明境  
山迴石壁峙儼若列九  
鼎四門森開張萬象無遁影  
碧潭凝其源澄泓開  
天井似開睡龍軒兼愁佛骨冷  
六月若清秋炎觸

失所栖玲瓏若鳳穴輪轉無停頃此意非偶然惆  
悵過夜永

次平城

葛一龍

言從擷香芷五日瀕江路傾危赴偃仰偏仄謝回  
顧深林雨濯濯隔水山箇箇亦有不耕人木末營  
茅茹自謂巢居尊罔知夜郎大

出普定

葛一龍

怪哉兼日路坦坦無迹邇居人不著土結構山之

巔舉爨候烽燧辟穀餐雲烟久處弗自異行者目  
為仙四序一氣候常此黃花天

得黔報寄示兩子

尹仲

仕宦通黔籍時比於放流頃者用戎馬反以才名  
收我昨權出處曾慮當見投未即猶奔林已同鷹  
在羈衰年履瘴鄉病軀親戈矛中子不樂聞況使  
老妻憂惟余性頗達死生同一漚炙額兼噴鼻壯  
夫昔所羞苟能了二觀未必無一籌世法今頗解

勉師老氏柔冠軍當辨戰都護或深謀聲靈仗英  
主小醜何足劉虔勤奉簡書功利不敢求畸人倘  
天幸為我營菟裘

軍中詩

尹仲

往時言苦樂總未行三軍軍中無尊賤軀命等一  
塵日月在雕鞍期會敢逡巡渡險每需次竟日河  
之濬危峰霜雪中斗帳冒荆榛暮炊常丙夜朝櫛  
必先晨銅焦徹曉鳴鄉夢苦不伸疲馬嚙枯草聲



息凌枕茵行營無餽糧据撫常未勻甘言慰徒旅  
卞性轉慈仁嗟哉靜潔心往往違天真有家不敢  
懷同曹羨居人

夙好黃老言謬謂通於兵為和不為倡陰節欲其  
盈主者有玄契桴鼓不輕鳴驕賊百里來剽銳亦  
善爭躍馬迫吾壘白刃光縱橫其氣已先竭矧能  
窺我情一決千仞豁殲之如落英

遊甕安後巖

曹代之

寒氣斂餘肅晴風振天表林麓動幽懷探歷盡奇  
竒孤筇躡危級寓目延清眺烟嵐淨遠山諸峰青  
未了湖光一片明孤情窮浩渺百感從中來俯仰  
各有道茫茫集百端欣慨縈懷抱古碣讀遺文歲  
月不易考轉境得幽異絕壁參空杳草木肆蒙茸  
怪石迷絲蒿石穴不可尋寒雲棲樹杪諸子爭勝  
情領畧具清皎踞石發高嘯登峰絕危討曲折頓  
忘疲感觸亦深悄歸途月色明回首孤峰小

新添晚村

劉泌

春力通原野，車馬恣新綠。歸心行失次，日入在荒麓。  
麓有村流水，邊溪花亦多。簇畎澹晚烟，蒙穉子驅歸犢。  
三五指行車，問君何所逐。感此良嘆嗟，歎靡止我輟。  
昏堂燈延客，居人失幽獨。夜深人盡卧，掩扃對殘燭。  
榮名亦區區，以已聽伸縮。如此車馬間，何曾語昔夙。  
月光明吐階，渠響越平陸。簡較生平心，惆悵鷄聲促。

國朝

秋日邀諸子遊黃平鼓臺山

米璉

風日具清皎秋氣在巖谷之子三五人逍遙互追  
逐領畧各為情幽勝隨意足修枝著微黃新條蔭  
深綠樵徑縱橫開落葉迷荒麓時聞鷄犬聲隔籬  
見茅屋杉檜隱荆扉短籬雜疎菊委折得石梁溪  
流琤寒玉殘陽漸欲低孤籬引清穆剝蝕古跡深  
摩挲苔蘚覆憑弔見興亡蒼茫動心目小酌倚長

松高霞照幽獨仰視浮雲翔因悲時序促塵網暗  
相牽高尚難自勗安得素心人共卧深山曲

蒲村歸田

錢邦芭

生平寡世情賦性耽閒逸塵網一羈牽舉步成礙  
窒沉思本無味忽忽如有失一朝決去就曠然深  
自得理我荷葉衣拂我筓笠逍遙田畝間昂首  
看雲色百物適自然欣彼歸飛翼

關索嶺

田雯

吾足右跛跢一人纔餘半畏登百尺樓况復凌霄  
漢茲巔箭鋒直勢傾一柱觀花鬢疊似螺嵐光鋪  
如練鳥徑一綫垂誰為假羽翰冷冷清風吹躡級  
倏無算兩腋盪間雲籃輿張風幔樹杪度午鐘依  
微露僧院昀昀竹嶼寬淦淦泉珠灌茶話已移時  
坐久烏巾岸格磔鳴不休思逐山禽散層層上上  
頭峰冒明霞亂古麝驚人跳戍旗隔樹斷小雨白  
氎濕晚店青蕙爨高吟行路難夜涼生寤嘆

石花

田 雯

瀟瀟三岔河蟲蟲萬仞若劃然地勢開烏川合一  
派兩屋古所劈峭立山不壞清和四月半湍流忽  
滂湃斑斕石上花初發卷如蠶望之塗朱紅晴霞  
落天外奇葩三五夕小者復漸大十里百數叢赤  
城冒青靄或圓如羽輪或高如懸旆經旬色微黃  
淡寂餘殘瀨天女采之去瓣蕊不可丐水漲畏蛟  
鼉觸舟多水怪洎夫水落時花空已難再石青壁

蘇光離離無根蒂獨於遠眺宜巨靈何狡獪

習安山水佳紅溪抱綠岑無如石花奇疑是優曇  
林安得凌首夏洄溯一相尋擘烟駕漁艇泛泛斜  
陽沉馮夷息浪鼓高柳鳴幽禽繫花衣帶間紅霞  
滿清襟汲水胭脂井晚炊還孤斟月上沿屋行往  
聽三潮音

平溪道中

湯右曾

五更江起霧暗裏蕩雙槳洶洶無停聲浩浩信長



往推蓬暫窺臨牒子浪花上川光互明滅山影迷  
俯仰纜船呼晨炊風日漸晃朗澄澄碧波映皎鏡  
平似掌迴湍成圓淵觸石怒濤響灘行屢紆直石  
骨轉森爽天寒竒姿露刻畫勞萬象千林散青紅  
絕景見無兩晨霞互斑駁雲錦亂泱泱綠流恍舊  
山水盡憶弭榜永懷滄洲趣暫此足清賞

高真觀

張大受

我來訪仙蹤幽亭築巖麓長松化龍鱗老桂孕兔

腹涓涓屋頂泉不竭寒繼燠遠望玲瓏石近倚蕭  
疎竹粵楷明始興創業重誅戮游戲似譎諫異人  
肯羈束浮沉隱亦仕轉旋禍為福山城騎鶴遊事  
比綺與用當今

天子聖仁德漸百族升朝簾紀綱賢俊罕隱伏不聞方  
伎流用幻惑世俗豈無高隱者學道侶麋鹿招之  
即肯來敢辭曳尾辱回望三百年荒厓寄孤躅殘  
碑奇字留捫蘇試重讀

飛雲洞

常安

飛來何處雲却到黔山住片片入洞中化石結鐘  
乳象如瓔珞垂氣若噴烟霧造物騁奇怪渾似人  
工錯洞外澎湃聲半空懸瀑布虬松老漢唐鳥道  
路迴互心目一豁然低徊還四顧役夫促前行斜  
陽正滿樹

山行

常安

山行復山行曲折羊腸路雲磴摩蒼穹人在雲中

度斜陽照馬鞍馬嘶芳草渡憶得二年前身從此  
山去無何白髮新此山青如故

王文成祠

晏斯盛

孟氏學有源龍門觀禹迹公獨得遐途良知自開  
闢當年謫龍場真幾茲勃發講學來貴陽知行無  
岐陌時復重一言大方消虺蜴經濟遽崢嶸有明  
資幹擘煌煌著事功的原心宅中稍異程朱亦  
自沛津筏夜來讀要書錢王未窺摘至善在人心

此知奚假易夏遊思念庵記言在紬繹安得祈溫  
觴相與存餘澤世世事春秋庸敢漫騷屑

飛雲洞

陳惠榮

古巖如屋覆山根足幽邃石形各異狀一一煩仰  
睇玲瓏冰飭滴比榔蜂房密滑突人乳垂拳曲佛  
手繫大者疑雲龍頭爪露靈異又如洪濤翻盤渦  
互騰沸沉沉太古色青蒼鬱虧蔽遙想融結初真  
宰勞位置下有不測洞蒙幕鬼窟閼蘊蓄雲水根

吐納山川氣倉皇昔經過執掌役王事今茲撫石  
欄揮洒勞人淚方池一泓水清徹識我意老栢勢  
更奇撐拄青霄際日月促勞筋倦足此暫憩摩挲  
亭上碑遊人富清製愧無曹劉才難勒石上字好  
帶片雲歸間擬柳州記

石阡道中題將軍陔

鄒一桂

孤標凌太虛受氣變霜雪  
叢木不能附點綴亂一  
切稜稜蒼骨寒了了挺高節  
山為仁所樂毋乃過

勇決那知堅壁中  
泉脈出自穴虛中  
涵智水流潤  
生膏澤外樸內文明  
此圖可觀易豈徒誇石筍椽  
筆書天闕

過天柱縣幫洞山

鄒一桂

三壺在海表風烈不能舟  
秦皇覓不見漢武將焉  
求物理近可譬此山即神洲  
鴻濛未歸壑激盪成  
彫鏤一朝變桑田陸海膠浮  
鷗宛如白蓮朶半放  
含清秋上結寶花臺疎磬鳴  
松楸得非壺公宅於

此邀浮丘盤旋轉蝸舍往返周華不蜂腰附蝶蟻  
蝓領飛蜉蝣對岸立鋒戟晨光耀兜鍪湯湯濯古  
礎砥柱滄溟流雀蛤以時變變蛭憐其儔安知吾  
不化鼓翅同莊周

七言古

唐

流夜郎贈辛判官

李白

昔在長安醉花柳五侯七貴同杯酒氣岸遙凌豪



士前風流肯落他人後夫子紅顏我少年章臺走  
馬著金鞭文章獻納麒麟殿歌舞淹留玳瑁筵與  
君自謂長如此寧知草動風塵起函谷忽驚胡馬  
來秦宮桃李向誰開我愁遠謫夜郎去何日金鷄  
放赦回

明

飛越峰天馬歌

楊慎

高皇御天開大明龍馬出自養龍坑房星夜下盧

龍塞天駟曉來驃騎營殿前重瞳親賜閱仗外奚  
官爭相迎鷄鳴牛首試控縱鳳師麟儀無逸驚追  
風絕塵羨迅疾逐日光影羞翾輕四蹄蹕然不踉  
地六飛如在空中行是時蠻婦有奢香左驂牡驪  
右牝黃貢上金陵一萬匹內廐惟稱此馬良宸游  
清燕幸鸞坡學士承旨贊且歌飲以蘭池之瑤水  
秣以藍田之玉禾飛越峰名自天錫駿骨雖朽名  
不磨至今百七十歲時山頭猶有養龍池方經地

志或挂漏箐苗洞獠那能知吾聞天下有道飛黃  
伏皐又聞王良策馬車騎滿野前時吉囊寇大同  
烽火直達甘泉宮近日莫瀛亂交趾羽書牙璋徧  
南中安得將星再降傳友德房宿重孕飛越峰一  
月三捷獻俘馘千旄萬旗歌熙雍嗚呼將相寧有  
種龍馭豈無媒經途訪迹一興慨郭隗孫陽安在  
哉長歌終曲長風來

赤虺河行

楊慎

君不見赤虺河源出芒部虎豹之林猿獠路層冰  
深雪不可通千尋建木撐寒空明堂大厦採梁棟  
工師估客穿蒙籠此水奔流似飛箭縛筏乘桴下  
蜀甸黯淡灩澦險倍過海洋流沙爭一線誰驅烏  
鵲役鼃鼃秋濤夏潦息盤渦栢亭雲屏濟川手奠  
民枕席休干戈安得修為夷庚道鐫刻靈陶垂不  
磨

普市

楊慎

孤城比屋雪封瓦重霧濃嵐幕四野飄飄風凹巧  
回鶻凝涸冰漕工溜馬倦客落日投主人冷突無  
烟炊濕薪敢辭白首禦魍魎眼見木天尤苦辛

盤江行

何景明

四山壁立色如赭盤江橫流絕壁下驚濤赴壑奔  
萬牛峻架懸空容一馬危叢古樹何陰森尋常行  
客誰敢臨猛婦清晨出深洞虎羣白晝行空林沉  
潭之西多巨石短棹輕舟安可適日光射壁蠻烟

黃雨氣蒸江瘴波赤土人行泣向我云此地前年  
曾敗軍守臣祇知需貨利將士欲苟圖功勲英雄  
謨策自有術竄婦奸男何足論營中鼓角連雲起  
陣前臨山後臨水烹牛醺酒自酣樂傳箭遺弓尚  
驚喜戰馬俱為山下塵征夫盡向江中死遂令狐  
豕成其雄屠邊下砦轉相攻千家萬家雞犬盡十  
城五城烟火空夕陽愁向盤江道黃蒿離離白骨  
槁魂入秋空結怨雲血染春原長冤草只今異域

來歸王高墩短塹俱已荒牧童驅羊上塋塚田父  
牽牛耕戰場惟有行人長嘆息聞說盤江淚沾臆

偏橋行

何景明

城頭日出一丈五偏橋長官來擊鼓山南野苗聚  
如雨饑向民家食生牯三尺竹箭七尺弩朝出射  
人夜射虎砦中無房亦無堵男解蠻歌女解舞千  
人萬人為一戶殺血祈神暗乞蠱沙蒸水毒草根  
苦上山下山那敢數蠡爾苗民爾毋侮虞廷兩階

列干羽

次奢香驛因咏其事

吳國倫

我聞水西奢香氏奉詔曾謁高皇宮承恩一諾九  
驛通鑿山刊木穿蒙茸至今承平二百載牂柯焚  
道猶同風西溪東流石齒齒嗚咽猶哀奢香死中  
州男兒忍巾幗何物老嫗亦青史君不見蜀道之  
關五丁神捷為萬卒迷無津帳中坐叱山川走誰  
道奢香一婦人



閣鴉行

吳國倫

我行渾入蠻王壘  
蠻兵被毳行且呼  
指點羅夷諸  
種落延袤千里  
依皇圖歷歷重  
柵臨斷浦  
塹壘木  
柵密如堵  
刀耕餘力射獵還  
礫雞賽鬼  
撾鞞鼓  
蜀  
賈無時市  
蒟醬漢使不復詢  
叩杖檻外  
驕嘶作馬  
肥園中醉  
擁麩姬唱  
閣鴉回首  
複嶺橫連雲不斷  
如長城  
此中藏甲不知處  
云是先朝  
靄翠營靄翠  
曾懸列侯印  
翊我高皇威  
獨震遙傳一檄定西南

世世稱藩無血刃豈其苗裔食故疆金紫蟬聯澤  
未央莫以彈丸誇險阻修文天子令堂皇

宿谷里

吳國倫

石門風高千樹愁白露猛觸羣峰流有客驅車早  
未休山寒五月仍披裘飢烏拉沓搶驛樓迎人山  
鬼聲啾啾殘月炯炯明吳鉤竹牀無眠起自謳

送永寧許使君

李攀龍

邢州十月凋白楊城頭出雲垂太行把酒相看日

欲墮五馬蹢躅大道傍問君胡為萬里去小臣罪  
合投窮荒我聞西南羅施國風氣鬱塞殊陰陽長  
官椎髻見朝吏海蠻醉鼓橐中裝男兒貴至二十  
石何地不可稱龔黃壯遊須令百粵盡探奇更得  
浮沅湘永寧雖惡無瘴癘明年雨露生還鄉

凌元洞

高鑑

東巖樂景物依稀俯城郭江草離離江水綠峰巒  
壁立危如削空然一洞光閃爍日色下照春霧薄

石瓶石鑪似人作雲萍踪跡隨飄泊髣髴如夢還  
如昨葡萄滿甕醅初潑狂歌起舞為君酌醉倒不  
知天地濶羣仙拍手騎黃鶴萬里天風吹寥廓俯  
視塵寰猶隱約何處好東巖樂

送顧將軍之貴州

沈一貫

漢皇昔事西南夷森然兵甲開羅施至今殺氣滿  
崖谷苦霧四塞陰風吹十日九日不見日見日猶  
應朝飯畢鬼心鬼面相構爭跳梁緣危如鳥疾將

軍有手能接猱腰間鷓鴣聲嗷嗷三年伐盡邛山  
竹蜀賈四出聲名高懸知眼中無若曹

邊軍擔夫謠

陸 榮

邊軍苦邊軍苦自恨生身向行伍月支幾斗倉底  
粟一半泥沙不堪煮盡將易賣辦科差顆粒那曾  
入鍋釜官逋私債還未足又見散糧來糴穀去年  
糴穀揭瓦償今年瓦盡兼拆屋官司積穀為備荒  
豈知剝肉先成瘡近聞防守婺川賊遣盡丁男行

運糧老弱伶仃已不保何況對陣關刀鎗婉婉嬌  
兒未離母街頭抱賣供軍裝閭巷哭聲日震地天  
遠無路問君王君不見京師養軍三十萬有手何  
曾捻弓箭太倉有米百不愁飽食且傍勾欄遊

擔夫來擔夫來爾為何者當軍差朝廷養軍為殺  
賊遣作擔夫誰愛惜自從少小被編差垂老奔走  
何曾息祇今丁壯逃亡盡數十殘兵渾疲墨可憐  
風雨雪霜時凍飢龍鍾強驅逼手搏麥屑淘水餐

頭面垢膩懸蟻虱高山大嶺坡百盤衣破肩穿足  
無力三步回頭五步愁密箐深林多虎跡歸來息  
足未下坡郵亭又報官員過朝亦官員過暮亦官  
員過貴州都來手掌地焉用官員如許多太平不  
肯恤戰士一旦緩急將奈何噫吁噫一旦緩急將  
奈何

遊鐵溪

陸 棻

野雲帶雨岩前落石室幽深鬼斧鑿馬蹄無處避

紅塵遐荒乃有此丘壑一樽相對共傾倒千尺塵  
纓忘羈縛掀髯長嘯回輕舟驚起長松一聲鶴

鷄頭關短歌

尹 仲

鷄頭關高俯江干碧石漸漸跳波寒大峰矜莊小  
峰銛腰領一綫剛七盤旌騎轟隱凌其巔罡風吹  
衣如舉翰漢家王業蒼莽間龍虎君臣氣已殘豺  
狼舔舐吮人肝安得猛士泥一丸扶桑挂弓馬不  
鞍虫虫之民筋力寬我行慷慨浩長嘆



渡盤江鐵橋

王錫衮

盤江始自武尋沱奔流萬里勢滌滌兩岸雄關插  
碧天一線羊腸山截嶠浪觸雲流倒瀉來逆望彭  
湃無時輟幾載舟人登櫂艱風急沿沂心膽裂天  
生英傑拯民溺獨創慈航志已決對此江神誓此  
身一片精誠鬼神徹飛梯何須藉鰲背金繩直嵌  
山之側橫空貫索插雲蹊補天絕地真奇絕曾聞  
羅浮道士作浮橋風雨薄蝕虞飄折又聞飛閣用

石鹽百年那得堅如鐵嗟哉我公為禹之功臣奚  
止云商家之舟楫祇令南北去住無望洋直令萬  
禩懷明德

國朝

水西行

彭而述

聖皇神武事長征天策羽林上將營特遣將軍授

廟筭鐵騎十萬水西城指揮如意真無比叱咤之  
間風雲起雕弓在簾箭在腰笑謂鼠子不足弭苗

壘何堪作戰場  
蜚洞蠻窟不可量  
混沌以前未見  
此密林深箐何  
茫茫鑿山剷道  
填鼓吹馬上飛  
鏐裏糗糒大者  
牛車小負擔日  
為朝廷開土地  
延袤四府多膏  
田烏蒙鎮雄與  
東川此輩婚媾  
相犄角古來結  
聚西南偏昨者  
露布三大捷或  
化鯨鯢或反接  
從茲一鼓須蕩  
平遐荒裔土歸  
臣妾甌脫自此  
供職方縱橫千  
里多稻糧

天子萬壽第而康  
獨攜長劍掃粃糠

題銅仁劉氏三烈女祠壁

李繩遠

灕江之水何噴薄下注蒼梧轉山郭昔我舟檣遠  
溯洄炎風苦霧迷旬朔江外紛紛烟草滋探幽不  
厭久棲遲行人盡說昭州道本有劉家烈女祠由  
來烈女名殊絕皎皎光輝照冰雪曾記碑名識妙  
辭健為圖畫真高節此際尋遊意不堪經今十載  
度黔南還騎匹馬銅岩路轉愛雙江匯碧潭碧潭  
翠嶺東西岸人代遷流幾迴換城闕空聞猿狄悲

繁華可惜逢離亂，亂餘榛棘漫經過。野殿疎牆睹  
薜蘿，猶聞劉女遺祠處，往蹟蒼茫思若何。始知昔  
日昭平水，烈女三人本劉氏。梧州別駕館舍捐兩  
姬，一女年相似。白馬牽旒歸去難，輕船遙泊莞藤  
灘。寧期擾路驅青犢，攜手俱沈江水寒。盈盈寒水  
空江曲，懷沙負石驚人目。御史封章入九重，褒題  
祀典崇華屋。瀘州舊州守，別駕之賢孫。投簪解紱  
已高卧，東山崑壑開蓬門。逢余約契稱相厚，家世

遺型幸討論銅江守令持清議俎豆重新事堪記  
館榭蒼苔夜月深簾階芳樹春風醉貝齒蛾眉兩  
地愁南黔西粵總千秋莞藤潭水今如昨那比香  
名萬古流

三丰道人壁影歌

田雯

神仙之說果有無幾見員嶠兼方壺風蟬蛻骨幻  
術耳逃名欺世夸清都劉安鷄犬事頗怪錢鏐年  
紀言多誣漢武不識東方朔祀竈却老何其愚人

生百年五倫重學仙佞佛皆傖夫羅施自昔號鬼  
國碧鷄金馬西南隅草木瘴癘山川窟其間或有  
烟霞徒熊經鳥伸訣自秘寸田尺宅理豈麤地產  
丹砂大於斗彭亨鼎火鉛汞腴異哉三丰倭倭侶  
掣蹋道士羣相呼永樂初載來黔地黎峨城市吹  
都盧石鉢流泉清且旨廟砌老桂榮不枯郭外層  
巒立千仞忽於巔頂傳形軀勾展顧吳作小照儼  
然一幅行仙圖華陽笠子兩芒屨手拖藤杖西方

趨飛瀑直衝入袍袖松花下落黏髭鬚馮虛御風  
將焉往何不為我停須臾神留宇宙四大字筆法  
倒薤非模糊誰人結構置峭壁巧匠斲削驚天吳  
始信靈蹤非妄誕裴徊不去坐日晡長生思假六  
禽戲前村微雨鳴鷓鴣

柳阮行

田 雯

翅塵楊柳春三眠風晴絮飛鋪白氈兩山夾岸生  
野烟栗留鳴樹何翩翩拖藍一沼清且漣下有萬



丈蛟龍淵北驪下嫁柔絲牽俄頃異物來蜿蜒晦  
冥雲物紛勾連神駒生長烏江邊粵昔貢自洪武  
年載拜稽首蠻王箋其毛如雪鱗如拳首高九尺  
花連錢壓沙八斛箭控弦奚官不用珊瑚鞭天閑  
十二人喧闐爭誇此馬真無前天子下詔黃帕纏  
賜名飛越峰以傳沙苑雲錦那並肩王毛仲爾將  
徒然貳師將軍絕可憐西域笑指中郎騫羅鬼嶺  
下奔紅泉但餘春水流濺濺按圖索駿空盤旋老

鴉關上斜陽懸臣漣之筆豐如椽高歌更有青藤篇

謁武鄉侯廟

田雯

銅鼓峰插城南陂漁磯百尺溪瀾瀾蠻雲作態僵  
不動上冒諸葛丞相祠丞相渡瀘來何速綸羽遍  
歷牂柯陞祁連未出首南服眼前雍孟如螳蚺九  
月凱旋捷書上瘴烟漠漠將軍戲遺廟三間塑泥  
像旁有酋帥濟火兒纏頭青布身藤甲野花覆額

連雙眉毒弩千鈞矢三十黃區月耳烏蒙驢當時  
再拜伏道左聚糧刊路無敢辭楚卒一隊擁前後  
乞憐丞相相許之功成配饗英風在手招羣鬼搖  
靈旗我瞻廟貌三歎息為譔文字磨豐碑水西黑  
羅最狡黠爾之鼻祖何人斯攻心為上術誠善如  
公作用良可師千載而下弔陳蹟古屋深箐藏狐  
狸長澗潺湲弄寒水似聽寶瑟彈哀絲四山寂寞  
秋色老霜白楓葉紅於脂

鐵鎖橋

田雯

粘天拔地山槎枒下有黝潭龍所家捷獵飛鳥不  
敢渡莊蹻瞠目空咨嗟巧鍛長絙三十六東西穿  
鼻貫石腹蟠竦屹立體橫陳直使天塹作平陸  
紅酣白糝兩山口蜃霧噴吐羣峰首畫家能事李  
將軍瀾滄江上如斯否縹緲五城十二樓神仙海  
嶠崑崙丘拔劍斲空不知險今朝快御天風遊

女官詩

田雯

我觀女官如觀畫閣立本繪職貢圖我觀女官如  
異夢奇形詭狀非一徒我觀女官如破寺陰風慘  
淡魍魎呼古鬼昏燈揭鉢立老佛變相獅龍趨妖  
狸髑髏抹粉黛脩蘿甲冑呼笙等雌者青瓊包蓬  
首雄者碧眼拳髭鬚女官氣概偉丈夫火浣大布  
纏其軀九尺藤杖紅珊瑚金環兩耳垂螭珠腰下  
斜挂雙湛盧繡裙拖地蓮花襦

迎春詩

田雯

上韋禿速毛頰黃勾芒鴉髻鞭筆長十夫舁舉蜃  
霧吐春帖紅膩蠻花張岑牟操搨次第起立部之  
伎何堂堂權輿一隊老農態荷鉏驅犢東作強立  
旗大書豐年字蒙頭草笠腰鶉裳山謠秧歌語莫  
辨盱眙口眼羣相將逐隊結連各變化風檣陣馬  
神飛揚焚童年紀十四五朱鉛塗面錦袖襦或彈  
笙簫弄箏笛或披甲冑揮戟槍或騎兕象佛子國  
或關珠貝波斯羗壯者壁壘頗與牧美者嬌冶施

兼牆旋風豈類天魔舞當筵不是成都娼最後一  
隊更奇絕身輕一鳥空中翔聳尻翹足立肩背公  
孫劍器爭毫芒斑文狸走雲旂動游龍蜿蜒來何  
方掉竿嫋索又一隊猱獐犴猪排兩廂村翁侏儒  
如猱鬼搖鈴跳月心顛狂金鍍雙睛銀貼齒假面  
獅子吟西涼

白樂天有西涼伎  
詩上句即用白語

鍾馗手拍銅綽板

揶揄調笑隨白狼傀儡登場乃如此何年演自宜  
春坊木瓜金筑接六詔一髮萬里西南疆山青敢

嗟瘴癘毒雪消且喜梅花香羅施之戲迎春曲放  
衙觀者如堵牆他時採作黔俗記蘆笙變鼓牂牁  
鄉

到黔

常安

年來擬作壯遊賦踏盡東西南北路帆影纔衝湘  
水波馬蹄又破黔山霧斜插尖峯形勢奇平懸峭  
壁重關固亂松坡上雨初晴古驛門前烟欲暮電  
激巖頭百道泉翠迷谷口千年樹猿啼虎嘯幾愁



聞星炯月寒頻怯步足底潛窺宿鳥歸耳根平洗  
飛雲渡巖崖有路石為梯懸市無城嵐作護村落  
參差勢不齊民情質樸安其素蠻烟掃淨廓封疆  
萬姓歡騰書露布

白水河觀瀑

鄒一桂

吾吳富水黔富山有山無水山不活深林祇覺嵐  
氣重多穴僅與狐兔窟十里一釣泉五里已成渴  
涓涓洑流山草沒縱有清駛無人撥轉岡忽聞萬

馬聲荒山鐘鼓何鏗鞳遙看始見白一線匹練晝  
暴妖虹橫兩旁水氣浸石壁濺跳珠玉烟霏輕天  
紳長垂不可卷白龍歸壑山風鳴觀瀑亭中頓忘  
飯馬芻僕飽運行旌山靈怪我笑枯寂獻此血脈  
流其精華峰蟻穴昔曾到莫炫奇異欺先生  
望水亭瀑布奇絕作歌紀之

張鵬翀

山幽路賈窮攀緣時聞細溜聲濺濺忽驚長橋

萬里

橋

古澗邊上流繚繞疑鋪壇下流百丈臨平川  
斷

崖一落空中懸濛濛似滾萬箔綿隨風裊裊騰蛇  
涎須臾直訝化作烟噴為晴雪飛翩翩乘虹飲練  
光熾然白日照耀摩尼鮮重重覆影斷復聯磳崖  
裂石雷聞聞神搖目眩神魂顛舊聞野兕藏渦漩  
吐珠今見驪龍淵川霞雪練斷碣鐫望川亭上風  
光偏窮觀直擬脫幘眠羲和未肯停征鞭欲去未  
忍情悄悄我臨匡廬三疊泉石梁瀑布天台巔龍  
湫雁宕阻未前黃黥九龍更鳴絃此間僻奧誰為

傳不悔萬里乘飛羈飽看銀河落九天重來坐擁  
歸輪邁朗吟逍遙秋水篇此身定作飛空仙

飛雲洞

靖道謨

豐隆當年求處妃南過黎峨憺忘歸徒御不戒喪  
輶茀化作岩石雲不飛石勢輪囷更飄颻千年猶  
作飛雲狀紛紛郁郁嵌玲瓏軒然高敞窮殊相金  
柯聳擢玉葉舒魚鱗劈絮堆砲車驚蛇走虺出穴  
窟猿臂鳥伸龍攫拏世人日看飛雲態看盡飛雲

無此圖巉巉雙峰峙洞口躡踞昂首如蒼狗武丁  
巨斧削不成不隨風捲長相守蒸濡靈液飛素練  
蒼壁白衣垂片片潺湲衝激響鏗訇空裏阿香車  
輪轉雲昏雨洒雷填填咫尺幻出心目眩造化不  
憫儻忽勞直將混沌都鑿徧南行險路難登陟來  
躡雲岩一休息襟袖飄飄爽氣生纓珞俱帶飛揚  
色世間原有飛來峰峰可飛來去亦得願假巨靈  
手劈開褰裳乘之周八極

石船

潘淳

南明河經銅鼓

名山

陽盤渦激石流湯湯江面不容

泛漁艇渡頭久已成輿梁吳楚昔聞戰長岸胡然

鬼國留餘皇天礮地豁墜山骨神工鬼斧為舟航

剗剗沙棠自中古鑿破渾沌開鴻荒長年次第具

篙槳估客絡繹浮湖湘豈知巨舸實其腹何時宇

內曾聊浪魚鄰鷗社幾聚散秋漲冬涸無低昂不

事捐湊與撇漩莫施錦纜兼牙檣挽緯徒勞衆力

集拍天一任洪濤揚下瀨千秋阻瀛海伏波萬里  
停遐方有力欲負不能負沉吟毋乃莊周藏蜀麻  
吳鹽永寂寞蘆花山月常蒼涼其上可列百人坐  
兩頭簫管歌中央俯憑夷宮子瞻嘯釣富春渚嚴  
陵狂造物結構詎無意天孫或用杭銀潢人間亦  
有登承渠其濶百步容龍驤不沉瓦鐵豈沉石誰  
能縮地如長房或如菱溪一大石幸逢六一傳篇  
章我欲留題復斂手斷無金薤垂琳瑯中流擊楫

慨焉嘆如泉之酒澆千觴吾生安得似汝壽亘千萬世觀滄桑

題雪厓洞

錢元昌

夜郎既伐靡莫滅山神効靈靈秀出麟鳳魚龍各擅名此洞清寒誰賞識職方圖志記載疎惟有神仙曾物色神仙物色亦年深榛塌祠荒鐘磬失直待安州方伯來搜剔空明除礙窒法相重裝丹碧新洞門四照光華逼光華透徹洞門開太虛冥冥



通呼吸六月揚風返日輪三冬積雪埋雲級還仗  
高僧一口風吹散雪花殺蟲蠶太平歲歲慶豐收  
永遠苗民安力食



貴州通志卷四十四